

24 JUN 1996

Pemuda-Afghanistan

PEMUDA SOKONG MALAYSIA JADI ORANG TENGAH DI AFGHANISTAN

KUALA LUMPUR, 24 Jun (Bernama) -- Pergerakan Pemuda Umno menyokong sebarang usaha menjadikan Malaysia sebagai negara pengantara atau orang tengah bagi membantu menyelesaikan konflik di Afghanistan, menurut kenyataan akhbar Setiausaha Biro Hal Ehwal Antarabangsanya, Mustapha Yaakub.

Afghanistan melalui Kuasa Usahanya di negara ini, Abdul Sattar Murad baru-baru ini merayu bantuan Malaysia dalam menyelesaikan konflik perang saudara di negara itu.

Mustapha berkata cadangan menjadikan Malaysia sebagai negara orang tengah itu juga telah dikemukakan oleh Pemuda Umno di perhimpunan agung luar biasa Kepimpinan Islam Sedunia di Benghazi, Libya, 14-15 Mei lalu.

Menurut beliau, rombongan Jawatankuasa Tertinggi kepimpinan tersebut akan berjumpa Perdana Menteri bagi membincangkan perkara itu.

Beliau berkata Pemuda Umno yakin dengan kredibiliti dan kemampuan Perdana Menteri, Datuk Seri Dr Mahathir Mohamad dalam membantu Afghanistan menyelesaikan konflik yang berlarutan itu.

"Pemuda Umno juga yakin hubungan persahabatan yang ada antara Timbalan Perdana Menteri, Datuk Seri Anwar Ibrahim dengan Gulbuddin Hekmatiyar (Pemimpin Pejuang Mujahiddeen) akan membantu kejayaan sebagai orang tengah itu," katanya dalam kenyataan itu.

Pemuda Umno yang juga mempunyai hubungan baik dengan Hekmatiyar bersedia membuat hubungan perintis bagi membuka jalan kepada usaha tersebut, katanya.

Pemuda Umno juga yakin negara-negara berkepentingan dalam konflik di Afghanistan seperti Pakistan, India dan Iran akan memberi sokongan kepada Malaysia.-- BERNAMA

NI PR